



## Jannie du Toit

Lirieke van my opnames. Meer te kry op my webblad  
[www.janniedutoit.com](http://www.janniedutoit.com)

### LEEUSPRUIT

Musiek: Jannie du Toit  
Teks: Jannie du Toit

Ek vat die snelweg uit die stad uit  
Draai met die grondpad af na Leeuspruit  
Ek wil weer sien hoe daardie grond lyk  
Ek het vergeet hoe kraalmis ruik  
Op mielieblare spring  
Wat jeuk en trane bring  
Wanneer ek saans teensinnig moet gaan bad

Ek is so lief vir die ou stad  
Maar dis weer tyd dat ek 'n breek vat  
Hoor hoe die beeste terugkom kraal toe  
Want hierdie wêreld praat my taal - oe  
Ek wil my nerwe afval  
Kleilat speel by die damwal  
Met 'n duisend knapsekêrels wat my mal maak

Dit pla my baie min wat jy dink  
Ek wil weer boorgatwater drink  
Ek soek my tannie en haar tuisgemaakte brood  
En die verlange word nou groot  
Om in 'n bloekomboom  
Se skaduwee te droom  
Of in sy takke rond te klouter tot dit donker word

Van toe tot nou  
Het baie water in die see geloop  
Van toe tot nou  
Is al wat vas staan glo en hoop  
Nou's ek terug op pad na daardie plek  
Ek sien weer Leeuspruit se motorhek  
Ek hoor die honde wat my motor jaag en blaf  
En my hart slaan op 'n draf –  
Dalk is ek af!

Maar ek soek die stilte van 'n voorhuis  
Ek soek 'n vreedsame kombuis  
Ek verlang so na 'n knipoog-boeregrap  
Ek mis my roereiers en pap  
'n Oom wat boekevat  
wat rustig bid  
en wat die dag sal afsluit  
met die Aangesang  
En 'n psalm van Dawid